

## Ils Rumantschs fundan ina grupp parlamentara

■ (cp) Per il giubileum da 75 onns rumantsch sco lingua naziunala en-vida la Lia Rumantscha il parlament federal ils 11 da december ad ina saira grischuna-rumantscha. Cun quella chaschun vegn fundada la nova Grupp parlamentara per la lingua e cultura rumantscha. Quella vegn presidiada da Martin Candinas (PCD/GR). En occasiun da l'empri-  
ma sairada grischuna-rumantscha en la chasa federala ed en preschientscha da cussegliera federala *Eveline Widmer-Schlumpf* e da la chanceliera federala *Corina Casanova* vul la Lia Rumantscha engraziar a las parlamentarias federalas ed als parlamentarischs federals per la simpatia ch'ils Rumantschs e la lingua rumantscha gaudan. La chaschun è il giubileum da 75 onns rumantsch sco lingua naziunala. Sco segn d'attaschadadad vegn fundada quella saira la «Grupp parlamentara per la lingua e cultura rumantscha».

### Il giubileum

Avant 75 onns è il rumantsch daventà lingua naziunala. Ils 20 da favrer 1938 han il pievel ed ils chantuns reconuschì il rumantsch sco quarta lingua naziunala. L'approvaziun impresiunanta da 92% è vegnida surpassada mo duas giadas en l'entira istorgia da la confederaziun. Quest sustegn naziunal dal 1938 è stà in dals svilups ils pli impurtants ed ha mess il crap da fundament per ulteriurs svilups da status giuridics e politics da la lingua rumantscha. Dapi lura è bler capità. Il clima d'avantguerra cun pensaments naziunalistics da la «Defensiun naziunala spiertala» dal 1938 n'exista oz betg pli. Las persunas rumantschas dad oz èn plurilinguas, mobilas ed han in'identitad linguistica ch'è individuala.